

30 AUG 2002

Filipina-Hubungan/I

RAMOS DIUTUS UNTUK PERBAIKI HUBUNGAN DENGAN KL

MANILA, 30 Ogos (Bernama) -- Pertemuan antara bekas presiden Filipina, Fidel Ramos dan Perdana Menteri Datuk Seri Dr Mahathir Mohamad dilihat sebagai usaha untuk memperbaiki hubungan dua hala yang terjejas akibat isu pendatang tanpa izin Filipina di Malaysia, kata seorang pegawai hari ini.

"Apa yang saya tahu Ramos amat rapat dengan Dr Mahathir," kata Ignacio Bunye, jurucakap Presiden Gloria Arroyo, kepada pemberita di sini.

Arroyo berkata pada Rabu beliau akan menghantar Ramos ke Kuala Lumpur sedikit masa lagi untuk menyampaikan kepada Dr Mahathir saranan berhubung penghantaran pulang pendatang tanpa izin dari negara ini yang tinggal di Sabah secara "teratur dan berperikemanusiaan".

"Kunjungannya akan membuka banyak pintu dan diharap akan mempercepatkan penyelesaian masalah ini," kata Bunye.

Ramos, bagaimanapun, belum mengeluarkan sebarang kenyataan sama ada beliau bersetuju memenuhi permintaan Arroyo itu.

Langkah itu diambil oleh Arroyo serentak dengan arahan para pegawai Jabatan Kehakiman agar tindakan diambil terhadap warga Malaysia yang memasuki Mindanao secara haram, yang disifatkan oleh penganalisis sebagai tindakan balas terhadap langkah yang diambil oleh Malaysia.

Setiausaha Kehakiman, Hernando Perez, berkata kira-kira 1,500 "orang dari Malaysia" memasuki negara ini setiap minggu melalui pelabuhan Zamboanga.

Beliau mendakwa kebanyakan mereka menggunakan pasport palsu Filipina.

"Saya telah mengarahkan biro kita mengenal pasti siapakah pemegang pasport palsu ini dan memfailkan pertuduhan terhadap mereka," katanya.

-- BERNAMA

ALJ MAM SP MAI